

दिनांक 29.08.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- व प्रधानमंत्री नरेन्द्र मोदी जापान की राजधानी टोकियो मांय कह्यो-भारत अर जापान की साझेदारी ई सदी की टेक क्रांति की अगुवाई कर सके है।
- व मुख्यमंत्री भजन लाल शर्मा नौजवानां ने नौकरी देवण की प्राथमिकता ने दोहराया-कह्यो-राज्य सरकार पूरी साफगोई सागे भर्तियां कर रही है।
- व केन्द्रीय खेल मंत्री मनसुख मांडविया अलवर मांय सांसद खेल उत्सव 2.0 की सुरुआत कीनी।
- व राज्य मांय चौमासा की बिरखा आवता दो सप्ताह ताई चालती रेहवण रा आसार-मौसम विभाग 10 सितम्बर ताई औसत ऊं बत्ती बारिश रा आसार जताया।

000

प्रधानमंत्री नरेन्द्र मोदी कह्यो है के भारत अर जापान एक-दूजा की मदद सारु आवता दस साल की रोडमैप तैयार कीनी है। वे आज जापान की राजधानी टोक्यो मांय जापान आर्थिक मंच ने संबोधित कर रह्या हा। श्री मोदी कह्यो के जापान की तकनीक अर भारत की होशियारी मिल र ई सदी की टेक क्रांति की अगुवाई कर सके है। प्रधानमंत्री मोदी कह्यो के दुनिया मांय थरता रा बारा मांय पहल जरूरी है। श्री मोदी कह्यो के आतंकवाद रे खिलाफ अर साइबर सुरक्षा रा बारा मांय दोन्यू देश आपसी मदद बाबत राजी व्ह्या है।

प्रधानमंत्री कह्यो के भारत निवेश रा सब ऊं भरोसेमंद बाजार रा तौर ऊं विकसित व्हे रह्यो है। श्री मोदी कह्यो के जापान की कंपनियां भारत मांय 40 बिलियन डॉलर ऊं बत्तो निवेश कीनी है। ई मौके जापान रा प्रधानमंत्री शिगेरु इशिबा कह्यो के दोन्यू देशां बीचे निवेश अर आपसी मदद सारु करार व्हेवणो म्हाणा रिश्ता मांय बढोतरी ने बतावे है।

000

लोकसभा अध्यक्ष ओम बिरला विधायी निकायां मांय सदस्यां रा अशोभनीय आचरण माथे चिंता जताई है। वे आज ओडिशा की राजधानी भुवनेश्वर मांय अनुसूचित जाति/जनजाति कल्याण समितियां रा राष्ट्रीय सम्मेलन मांय बोल रह्या हा। श्री बिरला कानून बणावण वाळां ऊं देश रा भला रा मुद्दां माथे दलगत भावना ऊं ऊंचा उठ र काम करण बाबत कह्यो। वे विधान मण्डलां मांय चर्चा अर संवाद की स्तर कम व्हेवण परां चिन्ता जतायी। श्री बिरला जनता रा भला की योजनावां की फायदो समाज रा वंचित तबका ताई पूगावण सारु सरकारी धन ने पूरी तरह काम लेवण अर मजबूत निगरानी तंत्र की जरूरत माथे जोर दीनी।

000

मुख्यमंत्री भजन लाल शर्मा कह्यो है के राज्य सरकार पूरी साफगोई सागे भर्तियां कर रही है। वे आज टोंक जिला रा टोडारायसिंह मांय बोल रह्या हा। श्री शर्मा कह्यो के नौजवानां ने नौकरी देवण माथे सरकार की खास ध्यान है। ई मौके मुख्यमंत्री बीसलपुर मांय 144 करोड़ रुपया ऊं बत्ता खर्च ऊं पुल बणावण रा काम की सुरुआत कीनी। ई मौके राखी ज्यी जनसभा मांय वे राज्य की पैली वाली कांग्रेस सरकार माथे पेपर लीक करावण की आरोप ओजू माण्ड्यो।

000

कृषि मंत्री किरोड़ी लाल मीणा राजस्थान लोक सेवा आयोग-आरपीएससी मांय मोटा पैमाना माथे धांधली व्हेवण रो आरोप लगायो है। वे कह्यो के आर.ए.एस. भर्ती परीक्षा-2018 मांय आयोग रा केई सदस्यां री भूमिका शंका रा घेरा मांय रही। आज जयपुर मांय खबरनवीसां सागे बातचीत करता थकां कृषि मंत्री कह्यो के राज्य मांय कुछ लोग गैर कानूनी साधनां रे जरिये प्रशासनिक अहलकार बण गया, ज्यां री जांच कर र वां ने नौकरी ऊं निकाळ्या जावणा चाहिजे।

श्री मीणा कह्यो के प्रदेश मांय लारला दिनां घटिया अर अमानक खाद-बीज अर कीड़ा मारण री दवाइयां बणावण वाळी कंपनियां माथे मारी ज्या छापां ऊं जुड्या मामलां मांय 62 एफआईआर दर्ज करायी ज्यी।

000

उपमुख्यमंत्री दिया कुमारी आज ब्यावर जिला रा देवमाली मांय भगवान देवनारायण उत्सव मांय शामिल व्ही। ई मौके वे वठे बेगो ई रोपवे बणावण रा काम री सरुआत रो भरोसो दिरायो।

000

केन्द्रीय खेल मंत्री मनसुख मांडविया आज अलवर मांय सांसद खेल उत्सव 2.0 री सरुआत कीनी। ई मौके श्री मांडविया अलवर मांय खेलां ऊं जुड्या बुनियादी ढांचा रा विकास सारु 10 करोड़ रुपया देवण रो ऐलाण कीनो।

केन्द्रीय खेल मंत्री कह्यो के पॉल्यूशन रो सॉल्यूशन साइकिल है, जो खुद रे पाण ऊबा व्हेवण री निशाणी है अर सगळा ने साइकिल चलावण ऊं जुड़ना चाहिजे।

खेलमंत्री कह्यो के फिट इण्डिया अभियान रा तैत मोटापा रे खिलाफ ई जाग जगायी जा रही है। वे खाण-पीण मांय तेल कम काम लेवण बाबत कह्यो। ई मौके अलवर रा सांसद भूपेन्द्र यादव ई मौजूद रह्या।

000

देश आज हॉकी रा जादूगर रा नाम ऊं पिछाण्या जावण वाळा महान खिलाड़ी मेजर ध्यानचन्द ने वां री जयंती रे मौके सिरधाभाव सागे याद कर रह्यो है। ओ दिन राष्ट्रीय खेल दिवस रा तौर ऊं मणायो जावे है। ई मौके आज तीन दिन रो फिटनेस आन्दोलन सरु करी ज्यो। इण रो ई साल रो मुद्दो एक घंटा खेल के मैदान में राख्यी ज्यो है। राष्ट्रीय खेल दिवस रे मौके ई दफा फिट इण्डिया मिशन रे मार्फत खेलां मांय भाग लेवण रो संदेश दियो जा रह्यो है। ई सागे ई लोगां ने रोजीना कम ऊं कम एक घंटा खेलकूद अर कसरत रे ज़रिए स्वास्थ्य रो ध्यान राखण री सीख दी जा रही है। ई मौके महान खिलाड़ियां ने सिरधाभाव सागे याद कर्या जावे है अर खिलाड़ियां रो मान कर्यो जावे है। ई दिन जीत अर जोश सागे टीम बण र काम करण अर एका ने बधावो दियो जावे है। ई दिन स्कूल-कॉलेज अर खेल संस्थानां मांय भांत-भांत री होड़ां अर जाग जगावण वाळा कार्यक्रमों रे ज़रिए लोगां ने खेल-कूद अर स्वस्थ जीवन रा फायदा बताया जावे है।

000

राज्य मांय आवता दो सप्ताह ताई चौमासा री बिरखा रो दौर चालतो रेहवण रा आसार बीचे 10 सितम्बर ताई औसत ऊं बत्ती बारिश व्हे सके है। मॉनसून री लकीर गंगानगर रा ऊपर ऊं व्हेती थकी कम दबाव रा सिस्टम ऊं निकळ रही है। इण रा असर ऊं राज्य मांय आवता दिनां चोखो मेह व्हेवण रा आसार है। राज्य रा ऊगणी अर आतूणी हलका मांय केई ठौड़ां हल्की ऊं मझला दर्जा री बरसात व्हे रही है, जद के कठे-कठे भारी बिरखा ई व्हे रही है। मौसम विभाग आज जैसलमेर,

जोधपुर, बाड़मेर, उदयपुर अर बांसवाड़ा समेत 11 जिलां मांय बिरखा रो येलो अलर्ट जारी कीनो है। ई बीचे आज दोपहरां राजधानी जयपुर रा केई हलकां मांय चोखो मेह बरस्यो। पाली जिला रा सेवाडी, मुण्डारा, फालना, बाली अर देसूरी समेत केई हलकां मांय चोखो मेह बरस्यो। भीलवाड़ा मांय ई झमाझम बिरखा व्ही। सलूम्बर जिला रा सराड़ा, सेमारी अर जयसमंद मांय ई जोरदार पाणी बरस्यो। भारी बारिश रे कारण नदी-नाळां मांय पाणी उफण रह्यो है अर हादसां रो खतरो बध ग्यो है। इण ने ध्यान राखता थकां सलूम्बर रा एस.पी. राजेश कुमार यादव जनता ऊं सावचेती राखण री अपील कीनी है।

लारला चौबीस घंटा मांय सब ऊं बत्तो 13 सेंटीमीटर पाणी बांसवाड़ा जिला रा सज्जनगढ़ मांय बरस्यो। झालावाड़ जिला रा डग मांय 11 सेंटीमीटर बरसात व्ही। नागौर, बारां, भरतपुर, बूंदी, सीकर, कोटा, झालावाड़ अर डूंगरपुर मांय ई चोखी बिरखा रा समाचार है। कोटा, उदयपुर, भरतपुर, अजमेर बीकानेर, जोधपुर अर जयपुर संभाग मांय काल कठे-कठे बारिश री संभावना है। ई बीचे चित्तौड़गढ़ री रूपारेल नदी मांय एक ही पिरवार रा पांच जणा बह ग्या, ज्या मांय ऊं तीन जणा ने हिफाजत सागे निकाळ लिया ज्या जद के दो जणां रो हाल ई पतो नी लाग्यो है, ज्यां री तलाश करी जा रही है। डी.एस.पी. अंजलि सिंह बतायो के पारसोली हलका रा हाड़ों का खेड़ा गांव रो एक जणो पिरवार सागे मोटरसाईकिल माथे सवार व्हे र जा रह्यो हो, जो चौसला पुलिया माथे पाणी रा जोरदार हलोळा मांय बह ग्यो। झुंझनू जिला रा उदयपुर वाटी मांय ई कुण्ड मांय डूब जावण ऊं दो जणां री मौत व्हे गयी। उदयपुरवाटी थाना प्रभारी बतायो के हादसो छापोली गांव रा कदंब कुंड मांय खुद री फोटो खींचण रे दौरान रपट जावण रे कारण व्ह्यो। अ लोग उत्तरप्रदेश रा बुलंदशहर रा रहवासी हा ज्यो सैर-सपाटा सारू राजस्थान आया हा।